

**CONCELLO DE
SANTIAGO**

Departamento de Deportes

NORMAS INTERNAS DE USO E FUNCIONAMENTO DOS PAVILLÓNS POLIDEPORTIVOS MUNICIPAIS.

As presentes normas serán de obrigado cumprimento para todas aquelas entidades, colectivos e/ou persoas físicas que teñan concedida a utilización de Pavillóns Polideportivos Municipais.

O obxecto desta normativa é garantir que se realice un correcto uso destes recintos ao efecto de colaborar entre todos a manter as instalacións nunhas óptimas condicións de funcionamento.

O uso das instalacións deportivas municipais está suxeito á aplicación da ordenanza fiscal 4.27 "PREZO PÚBLICO POLA PRESTACIÓN DE SERVIZOS E REALIZACIÓN DE ACTIVIDADES NAS INSTALACIÓNS DEPORTIVAS MUNICIPAIS".

→ HORARIOS DE APERTURA

O horario-tipo de apertura dos pavillóns municipais é o seguinte:

De luns a venres, de 9 a 14,30 e de 16 a 23 horas

Sábados, de 10 a 14 e de 17 a 21 horas.


Domingos de 10 a 14 horas.

Os festivos, salvo autorización expresa do Departamento de Deportes, as instalacións estarán pechadas.

As excepcións a este horario son as seguintes:

- ♣ Os pavillóns ubicados en centros de ensino teñen as mañás reservadas para a impartición da Educación Física Escolar.
- ♣ Os pavillóns de maior tamaño (Santa Isabel, Vite e Restollal) como consecuencia da súa alta demanda, teñen un horario de apertura superior pechando ás 23,30 horas de luns a venres e abrindo unha media de 4 horas máis en fin de semana.
- ♣ Este horario poderá sufrir alteracións nas épocas vacacionais e naqueles supostos concretos que previamente se autoricen por parte do Concello de Santiago.

→ NORMAS DE ACCESO AO RECINTO



**CONCELLO DE
SANTIAGO**

Departamento de Deportes

Unicamente poderán acceder ao recinto deportivo os colectivos e usuarios que teñan concesión expresa por parte do Concello de Santiago. Independentemente desta circunstancia, o conserxe da instalación poderá denegar a entrada ao recinto aos deportistas e clubs concesionarios —incluso suspender a actividade unha vez iniciada— se considera que existe algunha circunstancia extraordinaria que ao seu criterio o aconselle (exemplo: humidade en pista, pingueiras, deterioros na zona de xogo, ...).

Os usuarios deberán seguir as observacións e requirimentos do persoal a cargo das instalacións, estando obrigados a cumprir as presentes normas. Os comportamentos inadecuados e/ou vándalicos contra calquera dos elementos do recinto deportivo ou contra outros usuarios, suporá a expulsión inmediata da persoa ou persoas implicadas.

O uso das bancadas durante os adestramentos e as actividades que non son de competición está reservada unicamente para os deportistas/usuarios e membros técnicos dos clubs (adestradores, preparadores físicos, ...) e, excepcionalmente, para membros da Xunta Directiva da entidade ou persoa expresamente autorizada pola mesma. O resto de persoas (pais, nais, acompañantes en xeral dos nenos e nenas deportistas) poderán facer uso doutras zonas comúns do recinto (sala de espera, ...), se existen no recinto.


O Concello de Santiago resérvase o dereito a anular ou suspender calquera reserva se fora necesario, situación que se comunicaría coa máxima antelación á persoa e/ou colectivo afectado.

Non está permitido a entrada de animais, salvo no caso concreto dos cans guía.

Non está permitido comer pipas dentro da instalación nin acceder con envases de vidro e/ou cristal, botes ou calquera outro tipo de recipiente contundente.

→ **VESTIARIOS**

Aos vestiarios do Pavillón poderán acceder unicamente os deportistas dos clubs e/ou colectivos que teñan concesión de uso da instalación, o corpo técnico e/ou profesores, os árbitros nos casos de competición oficial e, puntualmente, algún membro da Xunta Directiva dos colectivos con concesión e que debidamente se acredite.



**CONCELLO DE
SANTIAGO**

Departamento de Deportes

O acceso a vestiarios realizarase con **15 minutos de antelación** á hora de uso reservada e con **60 minutos de anticipación** no caso concreto de actividades de competición (partidos oficiais).

En ningún caso, poderán acceder nenos ou nenas de forma puntual sen que estea presente na instalación o adestrador ou persoa responsable do grupo.

Excepcionalmente, naqueles deportes que estean a traballar con nenos ou nenas menores de 9 anos, permitirase que **un adulto acompañe a un neno/a** aos vestiarios sempre que a entidade da que dependa o autorice. Os grupos de nenos e nenas de 9 anos ou maiores accederán en presenza unicamente dos adestradores. Situacións especiais respecto desta norma serán valoradas de forma puntual no Departamento de Deportes.

Durante o uso dos vestiarios por grupos ou equipos de persoas menores de idade será obrigatorio a presenza na instalación dun adulto responsable ata que se abandonen.

Está prohibido cambiarse en zonas tales como pasillos, aseos e, en xeral, en calquera outra dependencia que non sexa un vestiario.

Finalizada a actividade en pista, os deportistas deberán de abandonar os vestiarios no prazo máximo de 25 minutos.

Recoméndase o uso de chanclas para ducharse e circular polos vestiarios.


Por motivos de seguridade, non se permitirá o uso de aparatos eléctricos.

Por cuestións de hixiene, non se permitirán as seguintes accións persoais dentro dos vestiarios: depilarse, afeitarse, cortarse as uñas e similares. Tampouco está permitido comer.

→ **PISTA DE XOGO**

É importante lembrar que o coidado e mantemento dos recintos empeza por un mesmo.

Todos os deportistas, adestradores e demais colaboradores que estean en pista durante a actividade deberán de ter calzado deportivo e indumentaria adecuada e adaptada á modalidade deportiva a desenvolver. Non se permitirá o acceso con calzado da rúa.



No que respecta ás modalidades de patinaxe e hóckei a patíns, no caso concreto dos pavillóns con chan de parqué, é necesario que cando menos os nenos e nenas maiores de 7 anos, empreguen patíns que estean adaptados a este tipo de superficie.

Recoméndase que se revisen con certa frecuencia o estado de conservación dos freos e rodas dos patíns para que non xeren problemas irresolubles no chan dos pavillóns que incluso poidan obrigar a suspender temporalmente a actividade. Especialmente preocupante son os freos dos patíns naqueles casos que por desgaste aparece algún elemento metálico (tipo tornillo ou similar) que en contacto co chan de parqué provoca importantes raiaduras. No suposto de que o conserxe da instalación valore que hai algún deportista que ten un patín en mal estado poderá supervisalo en presenza do adestrador/a. De confirmarse, o deportista deberá de abandonar a pista de xogo.

Queda totalmente prohibido que os deportistas veñan cos patíns calzados de fóra xa que, entre outros motivos, poden traer arenas ou calquera outro elemento que pode deteriorar as zonas de xogo, en especial, as de parqué.

No que respecta á modacidade de balonmán queda prohibido o uso de resina durante os adestramentos e actividades de competición non oficiais.


Non poderá haber botellas de auga na pista. Aqueles deportes que pola súa intensidade e necesidade precisen de auga para que os deportistas beban, esta deberá de colocarse nos lugares específicos que indique o conserxe da instalación, que en ningún caso será na zona de xogo.

Está totalmente prohibido cuspir e tirar calquera tipo de lixo na instalación e, en especial, na pista de xogo.

Naqueles deportes que precisen empregar algún equipamento específico (postes de voleibol, bádminton, ...) os adestradores e/ou deportistas maiores de idade do club ou colectivo implicado deberán de colaborar neste labor co conserxe da instalación, tanto no momento da súa colocación como na desmontaxe.

Non se poderán manipular os equipamentos deportivos existentes nas instalacións sen autorización do conserxe e sen que este estea presente. Está totalmente prohibido desanclar as porterías de fútbol sala/balonmán e colgarse delas.

→ **RESERVAS PUNTUAIS DE PISTA "uso libre"**



Enténdese como "uso libre" partidos, xogos deportivos e práctica deportiva en xeral por persoas físicas e non profesionais.

As reservas puntuais dos polideportivos para "uso libre" deberán de realizarse nas oficinas do Departamento de Deportes, aboándose a cantidade que proceda segundo cada caso, coas excepcións que a ordenanza fiscal 4.27 estableza e dentro dos criterios de xestión que o Concello determine.

Para o acceso de "uso libre" aos pavillóns municipais é requisito indispensable ser maior de idade. Os menores só poderán acceder e permanecer nas instalacións acompañados dun adulto, que será responsábel do uso da instalación.

A reserva das instalacións por parte de persoas físicas para o desenvolvemento de actividades deportivo-recreativas de carácter puntual realizarase cunha semana de antelación, é dicir, dunha semana para outra, podendo facerse efectiva a partir dos martes e de calquera das seguintes maneiras:

- Telefonicamente, de martes a xoves, en horario de 9 a 14 horas, chamando ao 981 528 730
- Persoalmente, de martes a venres, nas oficinas do Departamento de Deportes en horario de 9 a 14 horas.

De facer a reserva telefónica, será obrigatorio que a persoa a confirme recollendo o xustificante -antes do venres desa semana- nas oficinas do Departamento de Deportes no Estadio de San Lázaro, en horario de 9 a 14 horas. De non facelo, a hora reservada quedaría automaticamente liberada podendo ser novamente bloqueada por outro usuario.


As fins de semana unicamente se farán reservas se existe dispoñibilidade unha vez atendida a competición e demais actividades programadas.

O usuario responsable da reserva deberá de identificarse co DNI e presentar o seu xustificante na conserxería do recinto antes de acceder ás instalacións.

Cada usuario unicamente poderá reservar unha hora á semana e terá dereito a o uso dun vestiario.

O número máximo de deportistas por cada reserva e hora será de 15/16 e o número mínimo será de 7/8.

Calquera outro tipo de reserva a realizar por unha persoa física que non se axuste ao indicado neste apartado das normas, se valorará de forma específica polo Concello de Santiago.



→ **OUTRAS CONSIDERACIÓN**

Os Clubs e entidades con concesión de uso de instalación para toda a tempada deberán de cumprir a normativa específica e circulares adicionais que no seu momento se lles remita por parte do Concello de Santiago e que se consideran complemento ás presentes normas.

Os horarios e días reservados para a unha entidade/usuario son intransferíbeis, non podendo cederse a outro equipo, nin compartirse con outro club/usuario. As situacións puntuais sobre este respecto que se dean ao longo da tempada deberán de ser solicitadas por escrito e precisarán da autorización do Departamento de Deportes.


A entidade/usuario poderá perder a súa reserva de instalación se de forma reiterada e non xustificada:

1. Non fai uso da mesma.
2. Asiste cun número moi reducido de deportistas, inferior a 7/8 persoas.
3. Incumpre de forma reiterada cos horarios concedidos para a tempada.
4. Incumpre algunha das normas recollidas neste documento.

Os danos ocasionados na instalación ou en calquera dos seus elementos polos deportistas e usuarios en xeral, como consecuencia de actos negligentes ou de accións vandálicas, deberán de ser asumidos e compensados pola persoa ou persoas implicadas. No caso concreto de actividades vinculadas con Clubs deportivos, considerarase á entidade a responsable subsidiaria quedando obrigada a repoñer os danos producidos. A reiteración deste tipo de comportamentos ao longo da tempada suporá a automática anulación de todas as horas de uso das que dispoña a entidade, con independencia do equipo ou persoa que cometa a infracción.

Co fin de contribuír a garantir a seguridade de todos os usuarios das instalacións, os xogadores, adestradores e deportistas en xeral deben informar aos conserxes dos desperfectos ou anomalías que observen nos diferentes espazos das instalacións e, moi especialmente, nos equipamentos deportivos que están a utilizar (porterías, canastras, ...).

O Concello de Santiago recomenda a todos os deportistas que pasen un recoñecemento médico previo co fin de garantir a súa saúde.



CONCELLO DE SANTIAGO

Departamento de Deportes

O Concello de Santiago non se fai responsable dos obxectos extraviados, sustraídos ou esquecidos nos vestiarios ou no interior da instalación. Recoméndase non introducir no recinto obxectos de valor.

O Concello de Santiago declina toda responsabilidade das lesións que puideran producirse derivadas da práctica deportiva. Enténdese que no momento de facer uso dunha reserva de instalación os usuarios manifestan estar aptos para realizar actividade físico-deportiva.

Na conserxería das instalacións hai follas de incidencias e queixas a disposición dos interesados.

Para calquera información, dúbida ou suxestión respecto do uso e funcionamento destas instalacións deberán dirixirse ao Departamento de Deportes do Concello de Santiago, situado no Estadio de San Lázaro, porta 1.
Teléfono: 981 528 730, de luns a venres, de 9 a 14 horas.
Enderezo de correo electrónico: dptodeportes@santiagodecompostela.org

OUTROS TELÉFONOS DE INTERESE:

Bombeiros	080 /
Policía Local	092 / 981 542 323
Emerxencias	112
Cruz Vermella	981 586 969